

## CAPUT SECUNDUM.

## DE SEDE AUCTORITATIS IN ECCLESIA CHRISTI.

**30. — Prænotanda de auctoritate apud societatem naturalem et de auctoritate apud Ecclesiam :** — In omni hominum associatione adest naturaliter aliqua auctoritas sine quâ societas non esset (V. n. 29) : hæc autem auctoritas, ubi non ex ipso jure naturali, sicuti fit in familiâ, apud unum invenitur, saltem apud communitatem invenitur, atque inde in personas transit à communitate electas aut acceptas, nisi Deus ipse aliter disposuerit, sicuti fecerat, v. g., pro regno judaico. — Ita communiter doctores (1).

Illa autem auctoritas quam in Ecclesiâ Christi demonstravimus existere, differt, in pluribus certè gravissimis, ab auctoritate hâc quæ in omni hominum societate naturaliter invenitur (2). Hæc enim nunquam posset præsertim, sicut illa, sibi potestatem arrogare docendi infallibiliter

(1) V. notatim Suarez : *De Legibus*, l. III, c. iv; — ap. Migne, *Theol.*, t. XII, p. 450, 451; — et alias quos invenies cit. ap. Balmès : *Le Protestantisme comparé au Catholicisme*, c. XLIX, t. III.

(2) Hæc certè semper existere posset apud Ecclesiam, si Christus non aliam in eâ instituisset, nec ipse Fideles suos in societatem formasset. Tunc enim Christifidelibus semper licitum imò et laudabile fuisset per se sponte conjungi sive in plures societates sive etiam, si fieri potuisset, in unam, et aliquam sibi magisterii et regiminis formam constituere (V. n. 9), licet non infallibilem nec essentialiem et immutabilem. — Et ita reverâ ii etiam Protestantes qui nullam auctoritatem et societatem à Christo institutam dicunt, sese tamen efformare possunt in congregations sive separatas sive etiam plus minusve confederatas; atque hoc jure certè possunt, quin ideo inconsequentialia sint incusandi, talem talenve sibi constituerem pastorem aut deponere, imò et à societate excludere, dummodò, in hoc, non in nomine Christi agere intendant sed in nomine sua humanae associationis. Et cfr quomodò sese consequenter habuerit Synodus Protestantium in Gallia, a. 1872 (V. ap. *Etudes des Jésuites*, aout 1877, p. 247).

aut etiam dispensandi, uti postea dicetur, per sacerdotes ad hoc delegatos, internam delictorum remissionem. Auctoritas igitur in Ecclesiâ existens est essentialiter supernaturalis (1); — neque potuit, ad instar auctoritatis merè naturalis (2), è solâ Christifidelium consociatione naturaliter consequi, sed per positivam atque expressam à Deo collationem apud ipsos instituenda fuit, et ita reverâ per Christum instituta est, quemadmodùm in cap. præced. probavimus.

**31. — Catholicorum assertiones.** — Hinc porro sanè pronum est quærere anne Christus dum talem auctoritatem positive institueret, illius etiam formam et depositarios positivè determinaverit : quod nos Catholicî affirmamus, duo hæc statuentes, scilicet :

1º Christus auctoritatem ecclesiasticam — et quidem plenam — uni dedit in personâ Petri atque exinde Petri successoris, qui dicitur *Papa*, per excellentiam (3), seu Summus Pontifex :

2º Huic supremo Pastori alias etiam adjecit Pastores in personâ Apostolorum atque exinde Episcoporum, qui in partem auctoritatis ecclesiastice sub illo exercendam vocantur :

Et hæc omnia in perpetuum.

Hoc est totum Ecclesiæ sistema juxta Catholicos (4).

(1) Cfr Suarez : *de Leg.*, l. IV, c. 1, vii et ss.; — ap. Migne *Theol.*, t. XII, p. 732.

(2) V. ibid. l. III, c. iii, 5, 6; — ap. Migne, p. 447.

(3) Ille nempe titulus olim aliis quoque episcopis usitatus Romano Pontifici per excellentiam et absque addito attribui incepit ineunte sæc. vº (Conc. Tolet. I; S. Ennodius; etc.) atque illi definitivè mansit ineunte sæc. viº. (V. Thomassin : *Anc. et nouv. discipl.*, p. I, l. I, ch. iv, n. 10).

(4) Ex hâc statim expositione colligere est quòd, si in jure naturali vel divino steteris, societas ecclesiastica et societas civilis, juxta doctrinam apud theologos præsertim Medii Ævi communiter receptam, non simili sed inversâ ratione constituta apparent. Nempe, ut ait Bellarminus (quem

Quod evolvere ac probare satagemus posteà in sequentibus :

Artic. 1<sup>o</sup> : *De Papa*;

Artic. 2<sup>o</sup> : *De Episcopis* :

Coroll. Capitis, circa Ecclesiæ unitatem et apostolici-tatem.

Iis autem omnibus jam nunc præmittendæ sunt

#### OBSERVATIONES

##### Circa systemata nobis adversantia.

32 — Expositio : *Cæsarismus*, *Multitudinismus*, *Episcopalismus*; itidem et in gradu inferiori, triplex *Gallicanismi* species. — \*33 — Legitima præjudicia contrà Cæsarismum ; — \*34 — contra Multitudinismum, — 35 — contra Episcopalismum, cujuscumque gradus.

**32. — Expositio.** — Varia illa systemata ad triplicem typum referri possunt, *Cæsarismum* scilicet, *Multitudinismum* et *Episcopalismum*; et hæc tria considerari pos-

fusiùs cit. V. ap. Balmès, loco modò indic.) : «.... Colliguntur duæ diffe-» rentiæ inter potestatem politicam et ecclesiasticam : una, ex parte sub-» jecti; nam politica est in multitudine, ecclesiastica in uno homine (*Papa* » *scilicet*), tanquam in subjecto immediatè : altera, ex parte efficiens; » quodd politica universè considerata, est de jure divino; in particulari con-» siderata, est de jure gentium; ecclesiastica omnibus modis est de jure » divino, et immediatè à Deo. » *Controv.* t. II; 2<sup>a</sup> *Controv.* gener. I. III, *de Laicis*, c. vi (Cfr. in cap. voluminis, *Recognit.* n. xxvi.) — Nec absimiliter Suarez : « Potestas civilis immediatè est in communitate hu-» manæ; ecclesiastica autem potestas residet principaliter in Christo ho-» mine : unde fit, ut, quoad subjectum proximum, illa prior sit in eo ho-» mine cui communitas illam commisit, vel in successoribus ejus; hæc » verò sit in eo cui Christus illam commisit, vel successoribus ejus, » aut mediante ipso in aliis. » (*De Legibus*, l. IV, c. viii, 6). — Quos ita resumere videtur Fénelon : « La puissance temporelle vient de la com-» munauté des hommes, qu'on nomme nation; la spirituelle vient de Dieu, » par la mission de son Fils et des Apôtres. » (*Plans de gouvernement*, art. II, § iv; — cfr et *Tr. du minist. des pasteurs*, chap. ii, versus med.) — De hæc theorìa V, APPENDICEM III<sup>am</sup>,

sunt sive sub formâ rigidiori, quæ nunquam nisi inter Acatholicos viguit; — sive sub formâ mitigationi, quæ inter ipsos Catholicos aliquando sibi fecit asseclas, et opiniones illas peperit non ita pridem apud nos sub *Gallicanismi* nomine sæpe comprehensas. Qui quidem et ipse triplicis speciei distingui poterat, prout ad talem vel tam supradictarum hæresem accedebat; unde jam habebatur Gallicanismus *regalistæ* seu *parlementarius*, *Gallicanismus multitudinista* seu *democraticus*, et *Gallicanismus episcopalista* seu *ecclesiasticus* (præter quasdam veluti intermedias species). Hodie autem omnes istæ opiniones, jam definitivè ab Ecclesiâ catholicâ damnatae, extra Catholicismum et ipsæ reponuntur.

Posthabitis nempe illis qui, ut in Cap. præced. vidimus, nullam omnino auctoritatem ecclesiasticam à Christo constitutam agnoscunt, — hi quos nunc aggredimur, aliquam hujusmodi auctoritatem, saltem verbo tenus (1), omnes admittere videntur. Verùm, ex his,

Alli I<sup>o</sup> illam dicunt auctoritati civili ex ipsâ voluntate Dei esse annexam : et ii dicendi sunt simpliciter *Cæsaristæ* (sive cæteroquin civilem auctoritatem positam habeant penè Principes seu *Cæsares*, sive penè Multitudinem *civium* seu *populum*). — Ità plurimi apud Anglicanos (2).

(1) Dico... *saltem verbo tenus*; nam non semper facile est dicernere utrum ii qui auctoritatem ecclesiasticam in Principibus vel Multitudine reponunt, illam verè habeant tanquam auctoritatem quamdam specialem et supernaturalem proindeque ab institutione Christi eam derivent; — an ipsam habeant tanquam auctoritatem merè naturalem è Principum potestate vel Christianorum consociatione manantem, et sic recidant reapse in errorem jam præced. capite confutatum. — Et verò Protestantes plerique illam auctoritatem ita ab omni penè supernaturali prærogativâ mutilaverunt, ut sane jam queri possit an ad tam auctoritatem conferendam necessaria fuerit Christi institutio, nec sufficeret solus hominum consensus.

(2) Dico tantùm... *plurimi*; nám hodie præsertim non desunt in Ecclesiâ Anglicanâ qui aliter teneant, sicuti mox, ubi de *Episcopalismo*, dicetur; nec etiam ab initio defuerunt. — « On ne définissait pas clairement l'éten-